

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", broj: 7/97. i 3/99.), a u vezi sa članom 15. Zakona o zdravstvenom osiguranju ("Službene novine Federacije BiH", broj: 30/97.) na prijedlog Vlade Tuzlanskog kantona, Skupština Tuzlanskog kantona, na sjednici od 29.10.1999. godine, donosi

## **ZAKON**

### **O ZAVODU ZDRAVSTVENOG OSIGURANJA TUZLANSKOG KANTONA**

#### **I. OSNOVNE ODREDBE**

##### **Član 1.**

Ovim Zakonom Skupština Tuzlanskog kantona osniva Zavod zdravstvenog osiguranja Tuzlanskog kantona (u daljem tekstu: Kantonalni zavod).

#### **II. PRAVNI POLOŽAJ I SJEDIŠTE**

##### **Član 2.**

Kantonalni zavod posluje pod nazivom: "Zavod zdravstvenog osiguranja Tuzlanskog kantona Tuzla".

Skraćeni naziv Kantonalnog zavoda je: "Kantonalni zavod zdravstvenog osiguranja Tuzla".

Sjedište Kantonalnog zavoda je u Tuzli, ulica Franjevačka 36.

##### **Član 3.**

Kantonalni zavod ima svojstvo pravnog lica sa pravima, obavezama i odgovornostima utvrđenim Zakonom o zdravstvenom osiguranju, ovim Zakonom i statutom Kantonalnog zavoda.

Kantonalni zavod ima svoj račun.

##### **Član 4.**

Kantonalni zavod ima pečat sa slijedećim tekstom:

"Bosna i Hercegovina

Federacija Bosne i Hercegovine

Tuzlanski kanton

Zavod zdravstvenog osiguranja Tuzlanskog kantona

T u z l a"

Bliže odredbe o broju, vrsti i upotrebi pečata i štambilja utvrđuju se statutom Kantonalnog zavoda.

## Član 5.

Kantonalni zavod se osniva jedinstveno za područje Tuzlanskog kantona (u daljem tekstu: Kanton).

U sastavu Kantonalnog zavoda organizuju se poslovnice zdravstvenog osiguranja sa sjedištem u svakoj općini Kantona.

Prava, obaveze i odgovornosti, broj i naziv poslovnica zdravstvenog osiguranja utvrđuju se statutom Kantonalnog zavoda.

Poslovnice zdravstvenog osiguranja upisuju se u sudski registar i imaju otvorene akreditivne.

## III. DJELATNOST

### Član 6.

Djelatnost Kantonalnog zavoda je da:

- provodi politiku razvoja i unapređivanja zdravstvene zaštite koja se osigurava obaveznim zdravstvenim osiguranjem,
- planira i prikuplja novčana sredstva obaveznog zdravstvenog osiguranja, te plaća usluge zdravstvenim ustanovama i zdravstvenim radnicima koji obavljaju privatnu praksu,
- obavlja poslove u vezi sa ostvarivanjem prava osiguranih lica, brine se o zakonitom i blagovremenom ostvarivanju tih prava, te osiguranim licima pruža stručnu pomoć u ostvarivanju prava i zaštiti njihovih interesa,
- obavlja poslove ugovaranja sa zdravstvenim ustanovama i zdravstvenim radnicima koji obavljaju privatnu praksu,
- određuje kriterije, način korišćenja i visinu novčanog iznosa za naknadu putnih troškova u vezi sa korišćenjem zdravstvene zaštite i naknadu za pogrebne troškove,
- određuje visinu naknade plaće i najviši iznos naknade plaće na teret Kantonalnog zavoda, način valorizacije osnovice za naknadu plaće za vrijeme bolovanja,
- učestvuje u izradi i provodi međunarodne ugovore o socijalnom osiguranju u dijelu koji se odnosi na obavezno zdravstveno osiguranje,
- vrši obračun dugovanja i potraživanja troškova zdravstvenog osiguranja,
- obavlja poslove u vezi sa ostvarivanjem zdravstvene zaštite u inostranstvu,
- u saradnji sa Ministarstvom zdravstva obavlja nadzor i finansijsku kontrolu poslovanja zdravstvenih ustanova i zdravstvenih radnika koji obavljaju privatnu praksu u vezi sa zaključenim ugovorima za tekuću godinu,
- obavlja poslove izrade podzakonskih i općih akata u vezi sa ostvarivanjem prava iz obaveznog zdravstvenog osiguranja za čije su donošenje nadležni organi Kantona, odnosno Kantonalnog zavoda,

- uređuje ostala pitanja u vezi sa ostvarivanjem prava iz obaveznog zdravstvenog osiguranja,
- stvara uslove za organizovanje proširenog i dobrovoljnog zdravstvenog osiguranja u skladu sa Zakonom o zdravstvenom osiguranju,
- obavlja druge poslove utvrđene Zakonom o zdravstvenoj zaštiti, Zakonom o zdravstvenom osiguranju, ovim Zakonom i ostalim propisima.

#### Član 7.

Kantonalni zavod može proširiti djelatnost kao i vršiti statusne promjene: spajanje, pripajanje, podjelu i izdvajanje.

Odluku o promjenama iz stava 1. ovog člana donosi Skupština Kantona.

#### Član 8.

Rad Kantonalnog zavoda i njegovih organa je javan.

Javnost rada obezbjeđuje se na način utvrđen statutom Kantonalnog zavoda.

### **IV. IMOVINA I SREDSTVA**

#### Član 9.

Sredstva za osnivanje i rad Kantonalnog zavoda obezbjeđuju se iz doprinosa i budžeta Kantona, u skladu sa Zakonom o zdravstvenom osiguranju.

Sredstvima koja se obezbjeđuju iz budžeta Kantona osigurava se:

- pokriće povećanih troškova zdravstvene zaštite izazvanih većim odstupanjima u odnosu na planirana sredstva zdravstvenog osiguranja zbog određenih vanrednih ili drugih otežanih uslova sprovođenja zdravstvene zaštite,
- pokriće troškova zdravstvene zaštite lica starijih od 65 godina iznad nivoa obaveznog zdravstvenog osiguranja,
- pokriće troškova naknade plaće iz člana 57. stav 1. Zakona o zdravstvenom osiguranju, - pokriće troškova zdravstvene zaštite lica čije je prebivalište nepoznato,
- razvoj naučnoistraživačke djelatnosti, statističkih istraživanja u oblasti zdravstva, koja su od interesa za Kanton i razvoj zdravstveno-informacionog sistema u Kantonu.

#### Član 10.

Imovinu Kantonalnog zavoda čine nepokretne i pokretne stvari nad kojima je pravo upravljanja i raspolaganja imao dio Republičkog fonda za zdravstvenu zaštitu – Jedinica Tuzla, kao i novac i prava koja Kantonalni zavod stiče svojim poslovanjem.

## Član 11.

Kantonalni zavod u prometu istupa samostalno, a u okviru svojih ovlaštenja utvrđenih Zakonom.

Za svoje obaveze Kantonalni zavod odgovara sredstvima kojima raspolaže.

Skupština Kantona supsidijarno odgovara za obaveze Kantonalnog zavoda.

## Član 12.

Višak prihoda nad rashodima Kantonalni zavod će, uz saglasnost Skupštine Kantona, koristiti za obnavljanje i razvoj djelatnosti.

Višak rashoda nad prihodima Kantonalni zavod pokriva do visine sredstava sa kojima raspolaže.

Ukoliko Vlada Kantona utvrdi da su gubici Kantonalnog zavoda nastali iz objektivnih razloga, gubici se pokrivaju iz budžeta Kantona, kao pomoć za likvidnost u iznosu koji nedostaje.

## Član 13.

Kantonalni zavod ima rezervu koja se ostvaruje izdvajanjem sredstava u iznosu od najmanje 5% ukupnih rashoda ostvarenih u protekloj godini.

Sredstva rezerve služe za osiguravanje tekuće likvidnosti, za pokriće gubitaka i ne mogu biti korišćena za druge svrhe bez saglasnosti ministra zdravstva.

## Član 14.

Kantonalni zavod zaključuje ugovore sa zdravstvenim ustanovama i zdravstvenim radnicima koji obavljaju privatnu praksu, u skladu sa Zakonom o zdravstvenoj zaštiti, Zakonom o zdravstvenom osiguranju, drugim propisima i statutom Zavoda, uz prethodnu saglasnost ministra zdravstva.

Druge pravne poslove koji se odnose na nabavku roba, obavljanje usluga i ustupanje radova, čija je ukupna vrijednost veća od 50.000. KM, Kantonalni zavod može zaključiti samo uz prethodnu saglasnost ministra zdravstva.

## Član 15.

Kantonalni zavod obavlja preglede poslovnih knjiga i evidencija pravnih i fizičkih lica, radi kontrole pravilnosti obračunavanja i uplaćivanja sredstava za obavezno zdravstveno osiguranje.

Kantonalni zavod prati redovnu naplatu doprinosa za obavezno zdravstveno osiguranje svih obveznika plaćanja doprinosa.

## V. UPRAVLJANJE

### Član 16.

Kantonalnim zavodom upravlja upravni odbor.

Upravni odbor se sastoji od predsjednika i osam članova koje imenuje Vlada Kantona na prijedlog ministra zdravstva, i to:

- tri člana iz reda osiguranika zdravstvenog osiguranja,
- dva člana iz reda poslodavaca,
- četiri člana iz reda zdravstvenih radnika.

Članovi upravnog odbora se imenuju na period od četiri godine i po isteku tog perioda mogu biti ponovo imenovani.

Upravni odbor je za svoj rad odgovoran Vladi Kantona.

### Član 17.

Upravni odbor Kantonalnog zavoda:

- utvrđuje program djelatnosti obaveznog zdravstvenog osiguranja i mjera za unapređivanje obaveznog zdravstvenog osiguranja, utvrđuje politiku korišćenja sredstava obaveznog zdravstvenog osiguranja, daje smjernice za funkcionisanje stručne službe Kantonalnog zavoda radi pravilnog ostvarivanja prava osiguranih lica i racionalnog poslovanja,
- donosi statut Kantonalnog zavoda, uz saglasnost Skupštine Kantona, i druge opće akte za čije je donošenje ovlašćen zakonom,
- predlaže, saglasno zakonu, stope doprinosa za obavezno zdravstveno osiguranje,
- donosi finansijski plan i usvaja godišnji obračun,
- odlučuje o osiguravanju dopunskih sredstava i o načinu pokrivanja eventualnih gubitaka nastalih u poslovanju,
- vrši nadzor nad korišćenjem sredstava rezerve,
- razmatra i usvaja godišnji izvještaj o radu Kantonalnog zavoda i njegove stručne službe,
- razmatra izvještaj o kontroli vrste, obima i kvaliteta izvršenih zdravstvenih usluga,
- provodi prošireno zdravstveno osiguranje ako je uvedeno odlukom Skupštine Kantona,
- saraduje sa drugim kantonalnim zavodima osiguranja, Federalnim zavodom osiguranja i reosiguranja i drugim organima i organizacijama, u stvarima od zajedničkog interesa - određuje predstavnike u drugim organizacijama i dr,
- vrši i druge poslove za koje je ovlašćen zakonom, podzakonskim aktima, općim i drugim aktima.

Upravni odbor može obrazovati odbore i komisije za izvršavanje određenih zadataka.

## **VI. RUKOVOĐENJE**

### **Član 18.**

Kantonalnim zavodom rukovodi direktor.

Direktora Kantonalnog zavoda imenuje i razrješava Vlada Kantona na prijedlog ministra zdravstva.

Direktor se imenuje na period od četiri godine i po isteku tog perioda može biti ponovo imenovan.

Direktor je za svoj rad odgovoran upravnom odboru i Vladi Kantona.

### **Član 19.**

Direktor Kantonalnog zavoda:

- organizuje rad i poslovanje Kantonalnog zavoda,
- zastupa i predstavlja Kantonalni zavod,
- stara se o provođenju dogovora, sporazuma i ugovora koje Kantonalni zavod zaključi ili im pristupi,
- stara se o blagovremenom obezbjeđivanju finansijskih sredstava potrebnih za sprovođenje obaveznog zdravstvenog osiguranja, njihovoj namjenskoj upotrebi i zakonitom, pravilnom i blagovremenom ostvarivanju prava osiguranih lica,
- daje naloge za izvršavanje finansijskog plana i drugih akata upravnog odbora,
- stara se o pripremi svih akata i materijala čija je izrada u djelokrugu Kantonalnog zavoda, a koje razmatraju i o njima odlučuju organi vlasti, upravni odbor, odbori i komisije upravnog odbora i druga tijela obrazovana na osnovu zakona, podzakonskih akata, statuta i drugih općih akata Kantonalnog zavoda,
- rukovodi radom stručne službe i donosi stručna uputstva u cilju zakonitog, pravilnog i blagovremenog obavljanja poslova,
- obrazuje radne grupe za izradu složenijih akata i materijala,
- stara se o pripremi i organizovanju sjednica upravnog odbora, te odbora i komisija upravnog odbora, u skladu sa poslovníkom o radu ovih tijela,
- sprovodi izvršavanje odluka, zaključaka i drugih akata upravnog odbora i njegovih odbora i komisija,
- odobrava nabavku materijala i drugih sredstava potrebnih za rad stručne službe u skladu sa dinamikom trošenja sredstava i finansijskim planom donesenim od strane upravnog odbora,
- stara se o ostvarivanju javnosti rada Kantonalnog zavoda, njegovih organa i stručne službe,

- donosi odluke o prijemu i raspoređivanju radnika na poslove i zadatke, u skladu sa odlukama upravnog odbora i pravilnikom o organizaciji i sistematizaciji poslova, kao i druge odluke u skladu sa zakonom i općim aktom Kantonalnog zavoda,

- vrši i druge poslove koji su mu zakonom, podzakonskim propisima, statutom i drugim općim aktima stavljeni u nadležnost.

## **VII. STRUČNA SLUŽBA**

### **Član 20.**

Radi obavljanja stručnih, administrativnih i drugih poslova Kantonalni zavod osniva stručnu službu.

Stručna služba iz stava 1. ovog člana organizuje se tako da se osigura nesmetano, racionalno i uspješno obavljanje djelatnosti Kantonalnog zavoda.

Unutrašnja organizacija stručne službe Kantonalnog zavoda utvrđuje se pravilnikom kojeg donosi direktor, uz saglasnost Vlade Kantona.

## **VIII. NADZOR**

### **Član 21.**

Nadzor nad zakonitošću rada Kantonalnog zavoda obavlja Ministarstvo zdravstva Kantona.

## **IX. STATUT I DRUGI AKTI**

### **Član 22.**

Osnovni opći akt Kantonalnog zavoda je statut.

Statut Kantonalnog zavoda sadrži odredbe o:

- nazivu, sjedištu i nadležnosti,
- pečatu i štambilju,
- zastupanju i predstavljanju,
- organizaciji,
- broju, nazivu, pravima i obavezama poslovnica zdravstvenog osiguranja,
- odnosu prema korisnicima usluga,
- načinu raspoređivanja sredstava,
- pravima, obavezama i odgovornostima organa upravljanja i rukovođenja,
- stručnoj službi,

- rješavanju o pravima iz obaveznog zdravstvenog osiguranja,
- finansiranju i finansijskom poslovanju,
- kontroli sprovođenja obaveznog zdravstvenog osiguranja,
- načinu ostvarivanja javnosti rada,
- općim aktima i načinu njihovog donošenja,
- drugim pitanjima značajnim za rad Kantonalnog zavoda, utvrđenim zakonom.

Skupština Kantona daje saglasnost na statut Kantonalnog zavoda.

Kantonalni zavod može imati i druge opće akte u skladu sa zakonom i statutom Kantonalnog zavoda.

## **X. PRIJELAZNE I ZAVRŠNE ODREDBE**

### **Član 23.**

Danom stupanja na snagu ovog Zakona Kantonalni zavod će preuzeti prava i obaveze, sredstva, poslovni prostor, opremu i inventar i druge stvari, arhivu, akte, predmete i drugu dokumentaciju i sredstva za rad, od institucija koje su obavljale poslove zdravstvenog osiguranja na području Kantona.

Zavod ne preuzima obaveze nastale poslije 31.12.1993. godine, kao dana prestanka rada fondova zdravstvenog osiguranja, do početka rada Kantonalnog zavoda.

Obaveze iz stava 2. ovog člana, nastale u periodu kada su kantonalni organi raspolagali sredstvima doprinosa za zdravstveno osiguranje, padaju na teret kantonalnog budžeta.

Način izvršenja obaveza iz stava 2. ovog člana, koje padaju na teret kantonalnog budžeta, regulisat će se posebnim aktom Vlade Kantona.

### **Član 24.**

Kantonalni zavod preuzima rukovodne i ostale radnike, koji su na dan stupanja na snagu ovog Zakona bili zaposleni na poslovima zdravstvenog osiguranja na teritoriji Kantona.

Preuzimanje i raspoređivanje radnika u smislu stava 1. ovog člana, izvršit će se na osnovu internog konkursa prema potrebama procesa rada, te prema školskoj spremi i radnim sposobnostima radnika.

### **Član 25.**

U roku od 30 dana od dana stupanja na snagu ovog Zakona, Vlada Kantona će imenovati upravni odbor i direktora Kantonalnog zavoda.

### **Član 26.**

Kantonalni zavod je dužan donijeti statut, planove rada i finansijski plan u roku od 60 dana, a druge opće akte u roku od 90 dana od dana stupanja na snagu ovog Zakona.<sup>8</sup>

Član 27.

Upis Kantonalnog zavoda u sudski registar izvršit će se na osnovu ovog Zakona, koji predstavlja osnivački akt.

Član 28.

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona".

**B o s n a i H e r c e g o v i n a**  
**Federacija Bosne i Hercegovine**  
**T U Z L A N S K I K A N T O N**  
**S k u p š t i n a**

Broj: 01-011-224-20/99.  
Tuzla, 29.10.1999. godine

**Predsjednik**  
**Skupštine Tuzlanskog kantona**

**Dr. Izet Žigić**